

Bumbiro idzva redzidzo

RODZA PFUNGWA

AVAILABLE
IN LEADING
BOOKSHOPS ACROSS
ZIMBABWE!

or contact us at;

(Secondary Book Press, 74 Jason Moyo, 4th Floor, CABS CENTRE, Cnr Jason Moyo & 2nd St opposite Pick n Pay).

Tel: 0242771406 | 0242753201
WhatsApp or Call (Sandra) on
078 895 4870 or Tinotenda
on
071 699 0774

Gwaro reChitanhatu



Ropafadzo Mupunga

Bhuku romudzidzi

Rodza Pfungwa

Gwaro
reChitanhatu
Bhuku romudzidzi

Ropafadzo Mupunga



Zviri Mukati

Chikamu 1: Kukosha Kwedzidzo..... 1

A. Hurukuro.....	1
B. Nzwisiso	2
C. Pfupiso	3
D. Kududzira madimikira.....	3
E. Kuisa manzwi muuzhinji	4
F. Rondedzero.....	4
G. Mabasa evanhu munyika	5
H. Basa rekuita kumba	5

Chikamu 2: Upenyu Mudhorobha 6

A. Hurukuro.....	6
B. Nzwisiso	7
C. Pfupiso	9
D. Kuzadzisa tsumo	9
E. Mavara makuru	9
F. Kunyora tsamba	10
G. Midziyo yechinyakare	10
H. Basa rekuita kumba	11

Chikamu 3: Ivhu 12

A. Hurukuro.....	12
B. Nzwisiso	13
C. Pfupiso	14
D. Kuzadzisa zvirevo nenyaudzososingwi	14
E. Kuzadzisa zvirevo nemazita	15
F. Kunyora rondedzero.....	16
G. Mhuka nevana vadzo	16

Chikamu 4: Chimurenga Chechipiri MuZimbabwe..... 17

A. Hurukuro.....	17
B. Nzwisiso	18
C. Pfupiso	20
D. Kuzadzisa zvirevo nefananidzo	20
E. Kushandisa nyora “ ”	21
F. Kunyora rondedzero.....	21
G. Mwaka yegore.....	21
H. Basa rekuita kumba	22

Chikamu 5: Rwiyo RweZimbabwe...23

A. Hurukuro.....	23
B. Nzwisiso	24
C. Pfupiso	25
D. Kushandisa madimikira muzvirevo	25
E. Kushandisa chifemo (,)	26
F. Kunyora rondondedzero yemhan’aro	26
G. Mwedzi yegore.....	27
H. Basa rekuita kumba	27

Dzokororo Yekutanga 28

Chikamu 6: Magetsi 30

A. Hurukuro.....	30
B. Nzwisiso	31
C. Kunyora pfupiso	33
D. Kududzira zvirahwe	33
E. Kushandisa hameno, kana nanyangwe muzvirevo	33
F. Kunyora tsamba yebasa	34
G. Mufambo wemakiromita	35

Chikamu 7: Gore Renzara 36

A. Hurukuro.....	36
B. Nzwisiso	37
C. Pfupiso	38
D. Kuzadzisa zvirevo nenyaudzososingwi	38
E. Nyakuita nanyakuitirwa	39
F. Rondondedzero	39
G. Kuzadzisa zvirevo nemazita ehama	40
H. Basa rekuita kumba	40

Chikamu 8: Ndambakuudzwa Akaonekwa Nembonje Pahuma 41

A. Hurukuro.....	41
B. Nzwisiso	42
C. Pfupiso	43
D. Kushandisa nyauzdzososingwi	43
E. Zvakaitika, zviri kuitika nezvichaitika	44
F. Kunyora tsamba kuhama	45

G. Zvieraera	45	Chikamu 13: Kombiyuta	70
H. Basa rekuita kumba	46	A. Hurukuro.....	70
Chikamu 9: Nyuchi	47	B. Nzwisiso	71
A. Hurukuro.....	47	C. Pfupiso	72
B. Nzwisiso	48	D. Kushandisa fananidzo.....	72
C. Pfupiso	49	E. Kuisa zvimiso pakakodzera.....	73
D. Tsumo dzinoreva zvakafanana	49	F. Rondedzero	73
E. Manzwi akakodzera.....	50	G. Mazita ehama.....	74
F. Tsamba kushamwari	51	H. Basa rekuita kumba	74
G. Mitupo nezvidao	51		
H. Basa rekuita kumba	52		
Chikamu 10: Bvunzo Yekutanga.....	53	Chikamu 14: Ngano	75
Bepa rekutanga	53	A. Hurukuro.....	75
Bepa rechipiri.....	57	B. Nzwisiso	76
Chikamu 11: Upfumi HweZimbabwe.	59	C. Pfupiso	78
A. Hurukuro.....	59	D. Kushandisa fananidzo muzvirevo	78
B. Nzwisiso	60	E. Kunyora zviperengo zvakanaka	78
C. Pfupiso	61	F. Rondedzero	79
D. Kududzira madimikira.....	61	G. Kuzadzisa zvirevo nemazita enzvimbo .79	
E. Kudoma zambiringa munyemba.....	62		
F. Tsamba yebasa	62	Dzokororo Yechipiri	80
G. Tsoro yemanzwi.....	63	Chikamu 15: Njodzi Mumugwagwa...	82
H. Basa rekuita kumba	64	A. Hurukuro.....	82
Chikamu 12: Kutyora Kodzero	65	B. Nzwisiso	83
A. Hurukuro.....	65	C. Pfupiso	84
B. Nzwisiso	66	D. Madimikira ane dudziro yakapiwa.....84	
C. Pfupiso	67	E. Zita rimwe rinobatanidza manzwi ose ..85	
D. Kuziva zvinoreva tsumo	67	F. Rondedzero yemhan'aro	85
E. Manzwi ezviito	68	G. Kuverenga girafu	86
F. Rondedzero	68		
G. Mhuka nevana vadzo	69	Chikamu 16: Chitendero	
H. Basa rekuita kumba	69	ChechiKirisitu	87
		A. Hurukuro	87
		B. Nzwisiso	88
		C. Pfupiso	89
		D. Kududzira zvirahwe.....	89
		E. Kushandisa nyora “ ”	90
		F. Kunyora tsamba	90
		G. Mazita ehama.....	91
		H. Basa rekuita kumba	91

Chikamu 17: Hope.....	92	Chikamu 22: Chirwere Chemarariya..	117
A. Hurukuro.....	92	A. Hurukuro.....	117
B. Nzwisiso	93	B. Nzwisiso	118
C. Pfupiso	94	C. Pfupiso	119
D. Nyaudzosingwi dzine dzokororo	94	D. Manzwi anoreva zvakasiyana-siyana.....	119
E. Kuisa manzwi muushoma	94
F. Mitambo yekare neyanhasi	95	E. Zambiringa munyemba	120
G. Basa rekuita kumba	95	F. Kunyora rondonedzero yehurukuro	120
Chikamu 18: Magamba eZimbabwe..	107	G. Mwaka yegore.....	121
A. Hurukuro.....	96	Chikamu 23: Muenzi Haapedzi Dura .	122
B. Nzwisiso	97	A. Hurukuro.....	122
C. Pfupiso	98	B. Nzwisiso	123
D. Kuzadzisa tsumo	99	C. Pfupiso	124
E. Kuzadzisa zvirevo nezvipauro.....	99	D. Kududzira zvinoreva nyaudzosingwi	124
F. Rondonedzero.....	100	E. Zvaitika, zviri kuitika nezvichaitika	125
G. Midziyo yechinyakare	100	F. Tsamba kuhama.....	126
Chikamu 19: Bvunzo Yechipiri.....	101	G. Manzwi anoreva zvakapesana	126
Bepa rekutanga	101	Dzokororo Yechitatu.....	127
Bepa rechipiri.....	105	Chikamu 24: Rega Ndikubaire Zanhi.	129
Chikamu 20: Nhunzi	106	A. Hurukuro.....	129
A. Hurukuro.....	106	B. Nzwisiso	130
B. Nzwisiso	107	C. Pfupiso	132
C. Pfupiso	108	D. Kududzira tsumo	132
D. Tsumo dzinoenderana netunyaya.....	108	E. Zviperengo.....	133
E. Kutsanangura zvinoreva mazita	109	F. Tsamba yebasa	133
F. Kunyora tsamba kuhama.....	110	G. Kupa inzwi rimoreva zvakafanana	133
G. Mitupo nezvidau	110	H. Basa rekuita kumba	134
Chikamu 21: Dutumupengo	111	Chikamu 25: Chirere Mangwana	
A. Hurukuro.....	111	Chigokurerawo	135
B. Nzwisiso	112	A. Hurukuro.....	135
C. Pfupiso	113	B. Nzwisiso	136
D. Kupa dimikira rine dudziro yakapiwa	113	C. Pfupiso	137
E. Kuisa manzwi muuwandu.....	114	D. Kududzira zvirahwe.....	137
F. Tsamba yebasa	115	E. Inzwi rakakodzera	138
G. Kuverenga girafu.....	116		

F. Rondedzero yemhan'aro	139
G. Kuziva matare ematunhu.....	139
H. Basa rekuita kumba	140

Chikamu 26: Muchato WaMunaro NaMuchaneta.....141

A. Hurukuro.....	141
B. Nzwisiso	142
C. Pfupiso	143
D. Kuzadzisa tsumo	143
E. Zvipauro	144
F. Rondedzero.....	144
G. Mabasa akasiyana-siyana	145
H. Basa rekuita kumba	145

Chikamu 27: Uchapa Munharaunda146

A. Hurukuro.....	146
B. Nzwisiso	147
C. Pfupiso	148
D. Tsumo dzinoenderana nedudziro yakapiwa.....	149
E. Kuzadzisa zvirevo nemazita	150
F. Tsamba kushamwari	150
G. Kuverenga mepu	151

Chikamu 28: Kisimusি Bhokisi ..152

A. Hurukuro.....	152
B. Nzwisiso	153
C. Pfupiso	154
D. Kupa madimikira ane tsananguro yakapiwa.....	154
E. Kushandisa manzwi ezviito	155
F. Rondedzero.....	156
G. Manzwi anopikisana	156
H. Basa rekuita kumba	157

Chikamu 29: Gore Rapera158

A. Hurukuro.....	158
B. Nzwisiso	159
C. Pfupiso	161
D Tsumo dzinopesana	161
E. Kuisa manzwi muushoma	162
F. Tsamba kushamwari	162
G. Mazita emhuka nevana vadzo	163
H. Basa rekuita kumba	163

Chikamu 30: Bvunzo Yechitatu164

Bepa rekutanga	164
Bepa rechipiri.....	168

Chikamu

1

KUKOSHA KWEDZIDZO

A

Hurukuro

Dzidzo yakakosha zvikuru muupenyu hwevanhu. Kare dzidzo yaibva mungano, tsumo nemadimikira. Iko zvino dzidzo yave kubva mumabhuku, mumakombiyuta, mapepanhau nezvimwe zvinyorwa. Dzidzo inoita kuti vanhu vazive zvakana ka nezvakaipa. Dzidzo inhaka yeupenyu.

Tauriranai kuti:

- Dzidzo inowanikwa kupi?
- Tinowana dzidzo kubva pai?
- Ndezvipi zvakana kira dzidzo?
- Ndeapi mabasa anobva mudzidzo?

Manzwi ari mundima

Ipa inzwi rimoreva zvakafanana neiri sekuti;

Nguva – nhambo

Mudzidzisi – murairidzi

Mazamamishoni – bvunzo

- (a) usimbe
- (b) urombo
- (c) dhokotera
- (d) akasvikogamuchirwa
- (e) mazhinji
- (f) kushanda
- (g) aburuka
- (h) dzidzo

Kukosha kwedzidzo



Verenga ndima iyi uchidana manzwi nemazvo.

“Iwe Mukai! Mukai! Muka uenda kuchikoro! Chikoro chiri kutanga nhasi, zororo rapera Mukai.” Ava ndiamai vaMukai VaChikamhi vakanga vachimutsa mwana wavo Mukai.

Mukai akati warawashu pamubhedha ndokutanga kuzamura achishama n’ai akafinyamisa kumeso. Ainge ava kugozherwa nekumuka sezvo ainge apedza mwedzi waZvita wese akazorora achimuka nguva dzaaida.

“Amai regai ndimbopedzisa hope dzangu, musoro wangu uri kutema.” NdiMukai uyo akanga ozeza kumuka pamubhedha kuti anogeza aende kuchikoro.

VaChikamhi vakaudza Mukai kuti **usimbe** hahuna chidyiwa. Vakamuti aifanira kuti anoshanda nesimba kuchikoro sezvo ainge ave kuenda murugwaro rwechitanhatu. Gore raizotevera ndiro raaizopedza zvidzidzo zvake zvepuraimari.

VaChikamhi vakaudza Mukai kuti **djidzo** wainge uri musimboti weupenyu. Vakamuti mudzidzo ndimo munobva ruzivo rwezvidzidzo zvemasvomhu, ChiShona, ChiRungu, sainzi, makombiyuta, mitambo, tsika nezvimwe. Vakamuudza kuti mudzidzo ndimo mune mabasa ose ane mari akaita semad**dhokoter**a, vatyairi vendege, magweta nemamwe. Vakatizve mudzidzo ndimo munoita kuti vanhu vagone kugadzirisa matambudziko. Vakakurudzira Mukai kuti aende kuchikoro agonoshingirira pazvidzidzo kuti ramangwana rake rigova rakajeka.

“Pasina dzidzo upenu hunovava semhiripiri.” Vakadaro VaChikamhi. Vakaenderera mberi vachiti kusaenda kuchikoro kunouyisa **urombo**. “Unozopedzisira wave kuti jira rako moto, mutsago idanda. Mbavha, matsotsi nepfambi vamwe vavo vakashaiwa dzidzo vakaona sezvakanaka zvavanoita izvi.”

Mukai akaseka zvake akabva afungisisa manzwi aamai vake. Zvechokwadi dzidzo musimbotti weupenyu. Mupfungwa dzake Mukai akaona atove nebasu repamusoro ave kutyaira motokari. Akabva **aburuka** pamubhedha ndokuenda kunogeza.

Akazooneka amai vake oenda kuchikoro cheWhawha kuGweru. Mukai **akasvikogamuchirwa** nemudzidzisi mutsva ainzi VaKuraune. VaKuraune vakabayira zanhi vana vese verugwaro rwechitanhatu vavaizodzidzisa vachiti vakanga vachifanira **kushanda** nesimba nekuti mazamamishoni egore rechinomwe **mazhinji** aizobva muzvidzidzo zverugwaro rwechitanhatu. Vose vaifanira kukasira kuuya kuchikoro voita basa rese kuti vagobudirira pazvidzidzo zvavo.

Mukai neshamwari yake Sekai vakafara zvikuru kutanga rugwaro rwechitanhatu nehurudziro inofadza kubva kumudzidzisi wavo VaKuraune. Vana ava vakavimbisana kuti vaizoshanda nesimba gore iri.

Pindura mibvunzo inotevera nezvirevo zvakazara.

1. Mai vaMukai vainzi ani?
2. Mai vakamutsirei Mukai?
3. Mukai akanga ave kunodzidza rugwaro rwechingani?
4. Mukai akanga achidzidza kupi?
5. Mudzidzisi waMukai ainzi ani?
6. Shamwari yaMukai yainzi ani?
7. Doma mabasa maviri anoitwa nevamwe vanhu vasina kudzidza.
8. Doma mabasa maviri anoitwa nevanhu vakadzidza.
9. Nemhaka yei vana vakanzi vashande nesimba murugwaro rwechitanhatu?
10. Zvinorevei kuti kubayira zanhi?

C

Pfupiso

Pfupiso zvinoreva kunyora nyaya nepapfupi uchibuditsa pfungwa huru dziri mundima. Mupfupiso hamunyorwi mutauro wakaita setsumo, madimikira, fananidzo nenyaudzosingwi. Haufaniri kupfurikidza manzwi aunenge wakapiwa.

Nyora pfupiso ine manzwi asingapfuuri makumi matatu (30) uchitsanangura kukosha kwedzidzo kubva mundima.

D

Kududzira madimikira

Madimikira manzwi anoshandiswa kutsanangura tsika dzevanhu nepapfupi. Madimikira anowanzotanga nechiito sekuti;

- (a) Kupinda nemwenje mudziva – kufarisa.
- (b) Kudya marasha – kupopota.
- (c) Ane ruoko – anoba.

Dudzira madimikira aya;

1. Kubura munhu mumoto.
2. Kuchekwa nerakagomarara.
3. Kuita mawiramombe.
4. Kufamba rwako wega.
5. Kuita jemanewadya.
6. Kuisa gumbo murufuse.
7. Kugeza pakagezera bere.
8. Kutandavara sorunyemba.
9. Kutorwa mwoyo.
10. Kunzwa parere mwoyo.

E

Kuisa manzwi muuzhinji

Uzhinji zvinoreva kuisa manzwi muuwandu sekuti;

- (a) muti – miti
- (b) ruva – maruva
- (c) mbudzi – mbudzi

Isa muuzhinji inzwi rakatarwa.

1. Mukomana abata hove.
2. Uya uvhune rukuni.
3. Ainge achitamba nekakomana.
4. Vose vakayeredzwa nerwizi.
5. Akabatsira harahwa.
6. Akarara parupasa.
7. Ruvimbo asvuura gavi.
8. Ari kuona chivhitivhiti.
9. Achera mvura mumugodhi.
10. Amubata ruoko.

F

Rondedzero

Kana tichinyora rondedzero tinotanga nemavambo ayo anofanira kunge achinakidza kuitira kuti muverengi ade kuverenga rondedzero yako. Pakati perondedzero pane ndima dzinobudisa pfungwa dzinoenderana nemusoro werondedzero. Mhedziso yerondedzero inofanira kunakidza zvekare ichipendera pfungwa dzose dzabuda murondedzero.

Rondedzera basa raunoda kuzoita kana wakura.

Rondedzero yako inofanira kuva nemanzwi asingapfuuri zana nemakumi maviri (manzwi 120). Shandisa pfungwa idzi;

- Zita rebasa
- Kwauchashandira

- Unenge uchiitei?
- Unenge uchishandisei pabasa rako?
- Zvipfeko zvauchange uchishandisa pabasa.
- Nemhaka yei uchifarira basa iri?

G

Mabasa evanhu munyika

Munyika vanhu vanoita mabasa akasiyana-siyana anoita kuti nyika ibudirire. Somuenzaniso;

- (a) Munhu anovhiya varwere achivarapa anonzi chiremba.
- (b) Munhu anomiririra munhu apara mhosva anonzi gweta.

Zadzisa zvirevo zvinotevera nebara rakakodzera.

1. Munhu anozivikanwa pakurima anonzi _____.
2. Muumbi wehari anonzi _____.
3. Munhu anogadzira motokari nemadutavanhu akafa anonzi _____.
4. Munhu anofambisa dutavanhu anonzi _____.
5. Munhu anosungunutsa madzimai vana anonzi _____.
6. Munhu anozivikanwa pakuvhima mhuka anonzi _____.
7. Munhu anoshopera achirapa vanhu nemidzi anonzi _____.
8. Munhu anotungamirira vanhu kukereke anonzi _____.
9. Munhu anorapa varwere kuchipatara anonzi _____.
10. Munhu anodzidzisa vana kuchikoro anonzi _____.

mudzidzisi
n'anga

hurudza
nyamukuta

mukoti
mutyairi

mhizha
makanika

mufundisi
hombarume

H

Basa rekuita kumba

Endai munoteerera nhau mumadzimudzangara mugouya muchitaura nhau dzamakanza.

Chikamu

2

UPENYU MUDHOROBHA

A

Hurukuro

Vanhu vazhinji vanofarira kugara mudhorobha kudarika mumaruwa nokuti vanenge vachinakidza nekugara mumagetsi kwete muchiutsi. Vanofarira kuchera mvura papombi kwete kumatsime. Mudhorobha vanhu vanokwanisa kuva nenguva yekutandara vachiona mitambo, mafirimu nekuenda kunzvimbos dzinoyevedza.

Tauriranai kuti:

- Vanhu vanobvirei kumaruwa vachienda kumadhorobha?
- Ndezvipi zvinotandadza vanhu mumadhorobha?
- Ndeapi matambudziko anosanganikwa nawo kana vanhu vakawandisa mudhorobha?
- Matambudziko aya angagadziriswa sei?

Manzwi ari mundima

Ipa inzwi rinopesana neiri sekuti;

Maruwa – madhorobha

Zhinji – shoma

- (a) Vazhinji
- (b) Vakananga
- (c) Pasingabvumirwi
- (d) Vasingashandi
- (e) Vachiwana
- (f) Vanofarira
- (g) Kurarama
- (h) Vachienda

Upenyu mudhorobha



Verenga ndima iyi uchidana manzwi nemazvo.

Zvinokonzenza kuti vanhu vabve kumaruwa vachienda kumadhorobha

Vanhu **vazhinji** vanobva kumaruwa vachienda kumadhorobha kunotsvaka mabasa. Vazhinji vanenge vachida kunoshanda mumafekitori nemumaindasitiri. Vamwewo vanenge vachida kunotengesa muzvitoro.

Vanhu vanogona kuenda kudhorobha vachishanyira hama neshamwari dzavo vopedzisira vatorwa mwoyo neupenyu hwemumadhorobha. Upenyu hunovanakidza ndehwekugara mumagetsi vasingakachidzwi noutsi. Vamwe ndivo **vanofarira** kushandisa mvura yepapombi vasingachasengi migomo mumusoro. Vamwewo ndivo vanofarira kufamba mutara musina kana guruva. Vanenge votozviona vasiyana neupenyu hwemumaruwa.

Vabereki vanogona kutorwa nevana vavo vanoshanda mumadhorobha vogara navo. Vamwe vanozopedzisira **vakanganwa** kumusha vonakirwa neupenyu hwekuswera vachifurwa nemhepo vasingaiti mabasa anobudisa ziya sekurima nekusakura.

Matambudziko anosanganikwa nawo mumadhorobha

Mumadhorobha mawandisa vanhu. Vamwe havasi kusvika **vachiwana** mabasa saka vanozopedzisira voita matsotsi anobira vamwe kuti vawane **kurarama**. Vamwewo ndivo vanozoita pfambi votora varume vevanhu kuti vazviraramise. Izvi zvinozokonzenza zvirwere zvakaita semukondombera nezvimwe zvirwere zvepabonde.

Dzimba dzemudhorobha dzinobhadharwa kuti udzigare. Kutenga imba kana sitendi kunodhura kunotoda vane mari zhiji. Vaya **vasingashandi** havazogoni kubhadhara dzimba idzi kana kudzitenga. Vamwe vavo vanozopedzisira vavaka tudzimba twemapepa, twemapuranga kana tweuswa. Vanovakira **pasingabvumirwi** kuvakira. Izvi zvinoita kuti mudhorobha musanakidza kuona uye kuti nyika isvoreke.

Mune dzimwe nzvimbo mvura nezvimbuzi zvinenge zvichinetsa nokuda kwevanhu vanenge vawandisa mudhorobha. Izvi zvinoita kuti vanhu vabatwe nezvirwere zvakaita sekorera, rurindi nemanyoka. Utano hwevanhu hunenge hwava padambudziko.

Zvingaitwa

Dai zvaigoneka, hurumende yaivakira vanhu vasina dzimba mumadhorobha vovapa kuti vawanewo pokugara pane chiremera. Vaivagadzirira mapombi, zvibhorani nemigodhi pamwe nekuvaka zvimbuzi. Izvi zvinobatsira kudzivirira zvirwere.

Mumaruwa dai maiswa magetsi, mapombi, maindasitiri nemahekitor. Kana zvaderu vanhu vanenge voshanda mumaruwa vasingachaendi kumadhorobha. Vaya vanoda upenyu huri nane vanenge vohuwana kumaruwa saka vanenge vasingachaendi kumadhorobha.

Vanhu ngavawanirwe mabasa ekuita munyika kuti matsotsi nepfambi dzive shoma. Vanhu ngavadzidziswe mibato yemaoko sekusona, kuveza, kuruka majuzi nemimwe mibato yakasiyana-siyana kuti vawane zvokuita. Vaya vanenge vachingotevedza migwagwa vanozoita vashoma.

Upenyu hwemudhorobha hunonakidza kune vanoshanda nevane pokugara.

Sarudza mhinduro yakakodzera pamibunzo iyi.

1. Vanhu vazhinji vanotsvaka _____ mudhorobha.
A. midziyo **B.** mabasa. **C.** zvipfeko. **D.** chingwa.
2. Vomumadhorobha havakachidzwi neutsi nekuti kazhinji vanoshandisa _____.
A. marasha. **B.** parafini. **C.** huni. **D.** magetsi.
3. Inzwi riri mundima rinoreva kuti vakoshiwa ndi _____.
A. vakanganwa. **B.** vachifurwa nemhepo.
C. vonakirwa. **D.** vachishanda.
4. Matsotsi anoita basa re_____.
A. kugashira vanhu. **B.** kubira vanhu.
C. kuchengeta vanhu. **D.** kuvakira vanhu dzimba.
5. Chirwere chiri mundima chinoparadzirwa nepfambi _____.
A. mudumbu. **B.** korera. **C.** rurindi. **D.** mukondombera.
6. Kushaikwa kwemvura yakachena mudhorobha kunokonzerza _____.
A. rurindi. **B.** korera. **C.** mukondombera. **D.** zvirwerezvepabonde.
7. Mvura yakachena inowanikwa mu _____.
A. mufuku. **B.** rwizi. **C.** pombi. **D.** dhidho.
8. Mubato wemaoko _____.
A. kurapa. **B.** kusona. **C.** kudzidzisa vana. **D.** kuchaira dutavanhu.
9. Inzwi riri mundima rinoreva rupasa ndi _____.
A. dhorobha. **B.** pombi. **C.** magetsi. **D.** bonde.
10. Upenyu hwemumadhorobha hunonakidza kune _____.
A. vasina dzimba. **B.** vanoshanda. **C.** vasingashandi. **D.** vanoba.

C

Pfupiso

Kunyora pfupiso kunyora nyaya nepapfupi tichibata pfungwa huru dziri mundima. Mupfupiso hamuiswi mutauro wakaita setsumo, madimikira, nyaudzosingwi nefananidzo. Tinofanira kunyora manzwi asingapfuuri ataudzwa.

Nyora pfupiso ine manzwi asingapfuuri makumi matatu (30) uchitsanangura matambudziko anowanikwa mumadhorobha.

D

Kuzadzisa tsumo

Tsumo mutauro unoraira, unotsiura nekutonga mhosva pamatare. Somuenzaniso;

Kuraira – Seka urema wafa.

Kutsiura – Ndambakuudzwa akaonekwa nembonje pahuma.

Kutonga mhosva – Chafamba kamwe hachiteiwi.

Zadzisa tsumo idzi.

1. Pabva zino _____.
2. Chisi hachieri _____.
3. Kugocha kunoda kwaamai kwemwana _____.
4. _____ hariputirwi mumushunje.
5. Kushora mbodza _____.
6. _____. nhunzi dzikudye.
7. Dzawira mutswanda _____.
8. _____ hachiteiwi.
9. Yatsika musheche _____.
10. Matende mashava anovazva _____.

E

Mavara makuru

Mavara makuru anoshandiswa panotanga chirevo, pamazita evanhu, pamitupo nepamazita enzvimbo. Anoshandiswa zvekare pamazuva evhiki, mwedzi yegore uye pamazita erukudzo. Somuenzaniso;

- (a) Mai vakuya dovi.
- (b) Shamwari yangu inonzi Sarudzai.
- (c) Anoera Beta.
- (d) Anogara kuHarare kuKuwadzana.
- (e) Tinoenda kukereke neSvondo.
- (f) Muna Chikamu kunotonhora zvikuru.
- (g) Waenda kumba kwaVaChoga.

Mumigodhi munoshandiswa **mishini** nehora dzinoputisa matombo. Nokufamba kwenguva matombo aputiswa aya anozodyika zvishoma nevishoma oita ivhu.

Vamwe vanhu vanogadzira zviumbwa zvemhuka vachishandisa matombo. Pavanenge vachigadzira zviumbwa izvi vanenge vachitotsemura matombo oita ivhu.

Pane zvimwe zvipuka zvinogara pamatombo anenge akatsemuka. Zvipuka izvi zvinowedzera kutsemura matombo pazvinoenda pakatsemuka zvoita kuti dombo iri riite zvitombo zvidiki zvinozopedzisa zvava jecha. Jecha iri ndiro ivhu.

Kune **mhuka** huru dzakaita senzou, twiza, shumba nedzimwe. Mhuka idzi padzinenge dzichifamba dzinogona kutsika matombo. Matombo anenge asina kusimba anotsemuka opedzisira ava ivhu nekufamba kwenguva.

Ivhu rakakosha nokuti tinorima mariri, tinowana zvicherwa, tinovakisa naro uye miti, zvirimwa nebundo zvinokudzwa neivhu.

Pindura mibvunzo iyi nezvirevo zvakazara.

1. Ivhu rino bva mui?
2. Inzwi rino reva zvitombo zvinonaya nemvura ndi _____.
3. Ndeipi nzvimbo inopisa zvikuru masikati yozotonhora chaizvo usiku?
4. Chii chino itika kumatombo kana kuchipisa zvikuru?
5. Inzwi riri mundima rino reva nyundo ndi _____.
6. Ndeipi nhengo yomuti inotsemura matombo?
7. Ndezvipi zvino itwa nevanhu zvinokonzera kuti matombo atsemuke?
8. Ndezvipi zvino itwa nemhuka zvinokonzera kuti matombo atsemuke?
9. Ndechipi chinhu chinokonzera kuti matombo atsemuke mumigodhi?
10. Nemhaka yei ivhu rakakosha?

C

Pfupiso

Pfupiso kunyora nyaya nepapfupi uchibuditsa pfungwa huru dziri mundima yawaverenga. Mupfupiso hamubvumidzwi tsumo, nyaudzosingwi, fananidzo nemadimikira. Haufanire kudaridza manzwi awanzu usvitse.

Nyora pfupiso ine manzwi asingadariki makumi matatu uchitsanangura zvinokonzera kuti ivhu rivepo.

D

Kuzadzisa zvirevo nenyaudzosingwi

Nyaudzosingwi manzwi anotaridza maitikiro kana mataridzikiro echinhu. Somuenzaniso;

- (a) Maitikiro echinhu – Panashe akati toro nesango.
- (b) Mataridzikiro echinhu – Mazino ake akati weke-e kuchena.

F

Kunyora ronderedzero

Kana tichinyora ronderedzero tinotanga nemavambo ayo anofanira kunge achinakidza. Pakati peronderedzero panenge paine ndima dzinenge dzichitsanangura pfungwa dziri muronderedzero. Pfungwa imwe neimwe inofanira kutsanangura zvinogutsa. Ronderedzero inopedzisa nemhedziso inenge iri pfupiso yepfungwa dzapiwa.

Ronderedzera kukosha kweivhu.

Ronderedzero yako inofanira kuva nemanzwi asingapfuuri zana nemakumi maviri. Shandisa pfungwa idzi wozowedzerawo pfungwa dzako muronderedzero iyi.

- Ivhu rino bva kipi?
- Ivhu rino ita mabasa api?
- Ndezvipi zvipuka zvinogara muvhу?
- Ndezvipi zvicherwa zvinowanikwa muvhу?
- Ndezvipi zvatingaita kuchengetedza ivhu?

G

Mhuka nevana vadzo

Mhuka mukurarama kwadzo dzinoitawo vana. Vana ava vane mazita avanopihwa zvichienderana nemhuka yacho somuenzaniso;

- (a) Mwana wegwai anonzi **gwayana** kana kuti **gwizana**.
 (b) Mwana wenyuchi anonzi **zana**.

Nangisa mwana anoenderana nemhuka dzapiwa kuruboshwe.

Mhuka

1. Kamba
2. Rwaivhi
3. Katsi
4. Mbeva
5. Huku
6. Inda
7. Garwe
8. Nyoka
9. Gudo
10. Datya

Mwana

- | |
|-------------|
| buruvuru |
| korori |
| rakadzi |
| mandishaya |
| ganyamatope |
| manditeya |
| rushiye |
| chidharimbo |
| nhiyo |
| svorwi |

Chikamu

4

CHIMURENGA CHECHIPIRI MUZIMBABWE

A

Hurukuro

MuZimbabwe makarwiwa chimurenga chekutanga, chechipiri nechechitatu. Chimurenga chechipiri chakarwiwa kubva mugore ra1966 kusvika mugore ra1979. Ndicho chimurenga chakarwiwa kwenguva yakareba muZimbabwe.

Tauriranai kuti:

- Ndiani airwisana nevatema muchimurenga chechipiri?
- Chii chakaita kuti varwe?
- Ndezvipi zvombo zvaishandiswa muchimurenga chechipiri?
- Ndevapi varwi vashanu vakarwa chimurenga chechipiri?

Manzwi ari mundima

Isa manzwi aya muuwandu semuenzaniso;

Shungu – shungu

Mutemo – mitemo

Mwana – vana

- (a) Fodya
- (b) Mari
- (c) Nyika
- (d) Mudzimai
- (e) Tsoka
- (f) Rwizi
- (g) Muvengi
- (h) Musi

Chimurenga chechipiri muZimbabwe



Verenga tsamba iyi uchidana manzwi nemazvo.

House No. Q40
Torwood
Kwekwe

22 Gumiguru 2018

Wadiwa muzukuru Tadiwa

Ndakafara zvikuru kutambira tsamba yako iya yaida kuziva nezvechimurenga chechipiri chinova ndicho chandakarwa.

Zvaida kuzvionera pamhino **sefodya** kwete kuita zvokuudzwa. Chikonzero chakaita kuti chimurenga ichi chirwiwe ndechokuti varungu vinge vabva kuniya yavo inonzi Britain ndokusvitiora nyika yedu yeZimbabwe kuita yavo. Kare madzishe ndiwo aitonga nyika. Ivo vakasvikotorera madzishe simba ndokutotonga ivo.

Vakatorera vanhu vatema minda ine ivhu rakasimba vachivaisa kumaruzevha kune jecha roga. Vakatora vatema ndokuvashandisa muminda yavo, mumigodhi nemudzimba dzavo vachivapa **mari** shoma shoma. Vaimanikidza vatema kuti vabhadhare mitero pazvinhu zvavo. Varefu kudya zvevapfupi nekureba.

Vaidzvanyirira vatema chero padzidzo. Vatema vaingodzidziswa kuti vagone kuniya nekuverenga chete. Vatema vaisavika kufomu yechitanhatu. Vinge vachitonzi vadzidza zvikuru vaisvika muromu yechipiri.

Kwaiva nezvitoro, pokugara nezvimbuzi zvevarungu chete zvaisapindwa nevatema. Vatema vaityora mitemo vaisungwa vopuwa chitarafu chinorwadza. Mitemo iyi yakaita kuti vatema

5. Vatema vakanogariswa kupi?
6. Munyori wetsamba akanodzidzira chiuto kupi?
7. Chimurenga chechipiri chakatanga kupi?
8. Doma zvikonzero zviviri zvakaita kuti vatema varwise VaRungu.
9. Doma mutemo mumwe chete waidzvanyirira vatema.
10. Nyora matambudziko maviri akasanganikwa nawo nemunyori wetsamba iyi muhondo yechimurenga chechipiri.

C

Pfupiso

Nyora pfupiso ine manzwi asingapfuuri makumi matatu uchitsanangura matambudziko akasanganikwa nawo nevanhu vatema muhondo yechimurenga. Yeuka kuti mupfupiso hamunyori tsumo, madimikira, nyaudzosingwi kana fananidzo. Cherechedza manzwi awanzi usapfuure.

D

Kuzadzisa zvirevo nefananidzo

Fananidzo kutodzanisa tsika nemaitiro echinhu kana emunhu uchichifananidza nechimwe chinhu kana mhuka. Pafananidzo tinoshandisa manzwi anoti; **se- so- uye kunge** somuenzaniso;

- (a) Kudiwa semari.
- (b) Kufumuka kunge seri kwemusha.
- (c) Mazino akachena somukaka.

Zadzisa zvirevo zvinotevera nefananidzo yakakodzera.

1. Usaita chinya seche _____ rinodambura makumbo.
2. Ane utsinye sehwe _____ inoruma chaisingadyi.
3. Anoruta kunge _____.
4. Anofamba nedivi kunge _____.
5. Anorwisa kunge _____.
6. Manzwi ako anotapira kunge _____,
7. Chikafu ichi chinovava se _____.
8. Chenai anodyira kufa kunge _____.
9. Ane utsanana sehwe _____.
10. Mwana uyu akanaka kunge _____.

gakanje
mhiripiri

ngirozi
nguruve

nyoka
bere

gurwe
uchi

mvumba
kiti

E

Kushandisa chifemo (,

Chifemo chimiso chinoshandiswa panodomwa zvinhu zvakawanda somuenzaniso;

- (a) Mumhuri medu tinogara nambuya, sekuru, mai, baba nevana.
- (b) Huku, mbudzi, mombe, hwai nemadhongi tinozvipfuya pamba pedu.

Isa chifemo pakakodzera muzvirevo zvinotevera.

1. Pachikoro pedu pane vana vanoera Shava Gumbo Dube Shoko Shumba uye Moyo.
2. Varwi verusununguko vakaenda kuMozambique Zambia Tanzania China Romania neYugoslavia kunodzidzira chiuto.
3. Mureza weZimbabwe unowanikwa pazvikoro zvipatara makamba emapurisa emasoja uye pamahofisi ehurumende.
4. Zvirimwa zvinotengeswa kune dzimwe nyika ndezvinoti donje fodya nzimbe nemasamba.
5. MuZimbabwe mune nzizi dzinoti Deure Zambezi Limpopo Save neRunde.
6. Tinopfuwa zvipfuwo izvi mbudzi n'ombe hwai tsuro nemadhongi.
7. Mubindu mune murivo hanyanisi mapuno nematapura.
8. Maranjisi maapuro mabhanana magwavha nemanachisi michero iri pamba pedu.
9. Inyanga Vumba Matopo neGombe makomo ari muZimbabwe.
10. Pamutambo padyiwa nyama yehuku yemombe yehwai yetshuro matapura nemupunga.

F

Kunyora rondedzero yemhan'aro

Nyora mhan'aro kumukuru wechikoro chenyu uchimutsanangurira mafambiro amakaita muchienda kune imwe nzvimbo inoyevedza yamakashanyira sechikoro.

Mhan'aro inonyorwa seizevi:

Zuva: 5 Gumiguru 2019

Munyori: Tinashe Gono

Kuna: Mukuru wechikoro

Chinangwa: Mhan'aro yemafambiro atakaita kuenda kune imwe nzvimbo inoyevedza sechikoro.

Kana ukanyora misoro iri pamusoro nemavara madiki unotara asi ukanyora nemavara makuru hautari.

Sanganisa pfungwa dzinotevera ugowedzerawo dzako.

- Waive musi wechingani?
- Makaenda kupi?
- Makaenda nei?
- Zvii zvamakaona?
- Zvii zvamakadzidza?
- Kukosha kwekushanyira nzvimbo dzinoyevedza.

DZOKORORO YEKUTANGA

Verenga ndima iyi ugopindura mibvunzo inotevera nezvirevo zvakazara.

Usiku hwakabva Revai kumba, Yeukai, Mary naNyarai havana kuvata. Vakaedzerwa vachingoungudza. Vana ava vaise vapidigukirwa nenyika yose. Yeukai akataura ega achiti, "Chinoresva amai ini handichioni. Vanhu kuita godo nekuzvishandira kwavo. Hezvo vatete mai Ratidzai vakadzinga amai pano, vanouya kuzotipa zvokudya here? Kubva zvakashaika baba vakambotipa chokudya kana chokupfeka hacho? Zvakaoma vasikana!" Mwanasikana inzwi rake rakazhozha nekuchema. Vanin'ina vake vakachemawo. Dai misodzi yaitaura yaivabvunza kuti zvainge zvamboita sei kubudisa migorogodi yawo mhuri yese kudaro.

Usiku hwebare ihwohwo mai Ratidzai vakaedza kuti varare asi hope dzakavarambiria. Chero munhu ane mwoyo wakaoma sei, pane inzwi nyoro rinokushanyira kana watadza richikubvunza kuti, "Waitei?" Inzwi iri raiuya munzeve dzavo asi ivo vakatadza kuripindura.

Vakashaya rugare mumwoyo mavo. Vaingonzwa sevane dombo pachifuva chavo. Pavakazonzi biwei nehope vakaona haano mashura kuhope! Vakanza zita ravo richidaidzwa, "Chenai, Chenaiwo!" Inzwi raivadana vakariziva.

(Kubva muna Revai –naRopafadzo Mupunga)

Pindura mibvunzo inotevera nezvirevo zvakazara.

1. Ndiani ainge abva kumba?
2. Vanhu vangani vasina kurara mundima?
3. Ndiani ainge adzinga amai vevana ava?
4. Mai Ratidzai zita ravo rekuberekwa rainzi ani?
5. Chii chinoita kuti inzwi raYeukai rizhozhe?
6. Inzwi riri mundima rinoreva shanje ndi_____.
7. Mai Ratidzai vakaona mashura ei?
8. Mai Ratidzai vaise vatadzei?
9. Nyaya iyi yakabva mubhuku rionzi ani?
10. Ndiani akanyora bhuku iri?

Zadzisa tsumo idzi.

11. Matende mashava _____.
12. _____ unovinga shiri.
13. Chenga ose manhangwa _____.

Zvinorevai kuti,

14. Kutemwa dzinobuda ropa.
15. Kuva nemwoyo mutema.
16. Kubatiswa dombo.

Kana waya dzemagetsi dzikasasunganidzwa zvakanaka dzinogona kukonzera kuti chitofu, aini, chigayo kana feni zviputike zvobaka moto une njodzi. Moto uyu unokwanisa kupisa vanhu, midziyo nedzimba.

Waya dzemagetsi dziri pamatanda kunze hadzifaniri kutambiswa. Kana munhu akaedza kudzitora anogona kugwinhwa nemoto wemagetsi obva aomera ipapo.

Kana magetsi aenda tinofanira kudzima zvose zvanga zvakatungidzwa zvinoshandisa magetsi. Kana akasadzimwa anogona kudzoka ane simba rakanyanya opisa chitofu, nharembozha, chivhitivhiti, aini kana mimwe midziyo inoshandisa magetsi.

Waya inonzi reza waya inenge ine moto wemagetsi mukati mayo. Waya iyi haibvumirwi kubatwa nemaoko nokuti ukaibata unogwinhwa wopedzisira waenda kusingadzokwi.

Ngatichenjererei magetsi arege kutiendesa kwamupfiganebwe.

Sarudza mhinduro yakakodzera pamibunzo iyi.

1. Ndoupi mudziyo unoshandisa magetsi?
A. Ndiro. **B.** Hari. **C.** Chipunu. **D.** Nharembozha.
2. Kana tichishandisa midziyo inoshandisa magetsi ngatisabata nemaoko _____.
A. akachena. **B.** akasviba. **C.** akanyorova. **D.** akaoma.
3. Mvura kana ikasangana nemagetsi chii chinoitika?
A. Mvura inofashaira. **B.** Panobaka moto.
C. Magetsi anodzima. **D.** Magetsi anoshaya simba.
4. Kana tichishandisa midziyo inoshanda nemagetsi tinofanira kupfeka _____.
A. nguwan. **B.** magirovhosi. **C.** shangu. **D.** nhumbi.
5. Inzwi riri mundima rimoreva pachena ndi _____.
A. pamphene. **B.** kubvira. **C.** njodzi. **D.** kugwinhwa.
6. Inzwi riri mundima rimoreva kubaka ndi _____.
A. njodzi. **B.** kubvira. **C.** pamphene. **D.** marasha.
7. Chii chinoitika kana waya dzemagetsi dzikagunzvana?
A. Magetsi anodzima. **B.** Dzinobaka moto.
C. Dzinoshaya simba. **D.** Dzinoruza.
8. Reza waya ine _____.
A. mvura. **B.** ivhu. **C.** miti. **D.** magetsi.
9. Kusiya nyemba kudii?
A. Kufarisa. **B.** Kuramwa. **C.** Kufa. **D.** Kudada.
10. Kana magetsi oenda tinofanira kuita sei?
A. Kudzima zvose zvanga zvichishandisa magetsi aya.
B. Kutungidza midziyo inoshandisa magetsi.
C. Kumadira mvura.
D. Kumarova neshamhu.

C

Kunyora pfupiso

Nyora pfupiso ine manzwi asingapfuuri makumi matatu uchitsanangura zvingaitwa nevanhu kuzvidzivirira panjodzi dzemagetsi.

D

Kududzira zvirahwe

Zvirahwe mutauro waivako kubva pasichigare. Zvinoshandisa kuvaraidza vanhu. Zvirahwe zvinorodza njere apo paunenge uchifunga dudziro yazvo sekuti;

- (a) Mai ndebvu baba ndebvu – mbudzi.
- (b) Rakazvirova rikazhamba – jongwe.
- (c) Mutumba unorira usina ura – ngoma.

Dudzira zvirahwe izvi.

1. Mombe yababa vangu inokweva nemuswe.
2. Ndasiya akakombwa hameno akapona.
3. Ndamudzingirira ndikamukonewa.
4. Ndakwira mugomo ndikaona vadzimu vakanyenama.
5. Misodzi yambuya vangu kunaka.
6. Chitima chesango.
7. Zimunda rababa vangu rizere manhanganga machena.
8. Mombe dzababa vangu itsvuku dzoga dzoga.
9. Nzira mbiri dzinoenda mugomo.
10. Ndapanga hama iyo iripo.

gotsi
njanji

tsono
mhiripiri

zongororo
dohwe

sadza
mhino

muromo
uchi

E

Kushandisa hameno, kana nanyangwe muzvirevo

Hameno inzwi rinoshandisa pazvinhu zvatinenge tisina chokwadi nazvo sekuti;

- (a) Hameno kana akabvuma kundiruka.
- (b) Kana inzwi rinoshandisa pazvinhu zviviri kana kudarika sekuti;
- (c) Mai kana baba havadi vanhu vane misikanzwa.
- (d) Anogona kuuya neMuvhuro, Chipiri kana Chitatu.

Nyangwe inzwi rinoshandisa pakutsinhira pfungwa yapiwa sekuti;

- (a) Nyangwe zvake asina pekugara anogona kuchengeta mhuri yake.
- (b) Nyangwe zvake asina kudzidza ane mari.

Shandisa hameno, kana uye nyangwe pakakodzera muzvirevo izvi.

1. _____ kuti unouya rini.

2. Tichasangana _____ achifunga kuti akangwara.
3. _____ zvake ari nherera, anoshanda nesimba.
4. _____ kana akauya nezvandakamuraira.
5. Achandiudza nyaya yake _____ achida.
6. Tinoregererwa _____ tine zvivi zvakakura sei.
7. _____ kuti gore rino rinopera ari pamusha apa.
8. Ngaamuroore _____ azvipira.
9. _____ zvazvo kune nzara hatimboziyi.
10. _____ kuti akasangana naye kupi.

F

Kunyora tsamba yebasa

Tsamba yebasa inenge ine kero mbiri dzinoti kero yemunyori nekero yemunyorerwi. Pazasi pekero yemunyorerwi panonyorwa kuti Changamire. Pazasi pacho panonyorwa donzvo. Kana donzvo rikanyorwa nemavara madiki rinotarwa.

Kana rikanyorwa nemavara makuru haritarwi. Mavambo etsamba chinangwa chaita kuti unyore tsamba iyoyo. Mutsamba yebasa hamubvunzwi mufaro uye mutauro urimo ndewerukudzo. Panoperera tsamba tinodarikira mutaro tonyora kuti; Wenyu anovimbika wozopedzisa nezita rako nerekumba kwenyu somuenzaniso;

Gokomere Central Primary School

Post Office Box 174

Masvingo

20 Chikumi 2019

Mukuru wenzvimbo

Post Office Box 12

Masvingo

Wadiwa Changamire

Donzvo: Kutsananqura matambudziko atiri kusangana nawo pamusana pemagetsi

Wenyu anovimbika

Farai Mutema

Nyora tsamba kumukuru wenzvimbo uchimutsanangurira matambudziko amuri kusangana nawo munzvimbo menuy pamusana pemagetsi.


Mutumbi wetsamba yako unofanira kuva nemanzwi asingapfuuri zana nemakumi maviri. Shandisa pfungwa dzinotevera ugowedzera dzako.

- Njodzi dzinowanikwa mukushandisa midziyo yemagetsi yakafa.
- Njodzi dzinowanikwa mukukanganwa kudzima midziyo inoshandisa magetsi.
- Matambudziko ekushandisa mimwe midziyo yemagetsi nemaoko ane mvura.
- Matambudziko anowanikwa mukushandisa midziyo yemagetsi munguva imwe chete.
- Matambudziko etambo dzemagetsi dzisina kutsvetwa zvakanaka.

G

Mufambo wemakiromita

Mufananidzo unotevera unotaridza mufambo unofambwa nevana vashanu kubva pachikoro.



Pindura mibvunzo inotevera neChiShona chakanaka.

1. Kuda anofamba makiromita mangani kubva pachikoro?
2. Rudo anofamba makiromita mangani kubva pachikoro?
3. Tafara anofamba makiromita mangani kubva pachikoro?
4. Mufambo waKuda newaTafara wakasiyana nemakiromita mangani?
5. Mufambo waTinei naRudo wakasiyana zvakadii?
6. Chipo naTafara vanofamba makiromita mangani kana abatanidzwa?
7. Ndiani anofamba mufambo murefu kubva pachikoro?
8. Ndiani anobva pedo nechikoro?
9. Taura musiyano wemufambo unofambwa naKuda neunofambwa naChipo.
10. Mufambo unofambwa naTinei kana ukabatanidzwa newaRudo unotipa makiromita mangani?

Gore renzara



Verenga ndima iyi uchidana manzwi zvakanaka.

Chakava chisionekwi mudzi webwe. Gore ra2008 rakava gore rakarwadza vanhu, mhuka, shiri nezvisikwa zvose muZimbabwe.

Mudenga maiswera zuva rakati jenen'ene musina kana nekakore kose. Kana painyuka kakore, paiita mhepo yaivhuvhuta iyo yaikonzera kuti makore anyangarike **sedova**.

Vanhу vazhinji vaiswera vachiti gare gare votarisa mudenga vachifunga kuti zvimwe Nyadenga angavanzwira tsitsi akadonhedza misodzi yake asi zvakakona n'anga murapwa achida.

Migodhi nematsime zvakatanga kuoma kuti gwa-a. Madhamu nenzizi zvikati hatingasariri shure semhana. Zvakateverawo zvichioma. Hove dzakaita murakatira kufa dzashaya mvura. Mhuka dzinogara mumvura dzakaona **ndondo** gore iri.

Zvipfuwo nemhuka dzemusango zvaingoti ze-e ndiye tasa nenyaya yekushaya chekudy nechokumwa. Shiri dzaiti dzikati bhururu ndiye dhi-i pasi pfau pfau ndiye sarai. Vanhu vakasara musoro. Kuonda kwacho waiti mukonikoni. Kuona chibage gore iri raitova **shura** chairo. 2008 akanhongesa vanhu svosve nemuromo.

Kumaruwa, kumapurazi nekumadhorobha **chakata** dzakave muponesi wevanhu. Vanhu vaifumobata jongwe muromo kunhonga chakata. Vaiita **makundano** nemadhongi.

Madhongi aitetena chakata ari pazasi pemuhacha. Ainge orara pazasi pemuhacha achigarira dzinenge dzadonha.

Hacha dzakashandiswa kuita maheu, chingwa, bota uye dovi. Vanhu vaise vongoti chamuka inyama.

Mazhanje zvekare akararamisa ruzhinji rwevanhu nemhuka dzakaita setsoko nemakudo.

Vanhу vaienda pamizhanje nemasaga votanha mazhanje asina kuibva. Vaienda nowo vonopfimbika oibva ari mumba. Matamba akararamisawо vanhu gore iri.

Varume nevakadzi vakaenda kune dzimwe nyika dzakapoteredza Zimbabwe dzinoti; South Africa, Botswana neZambia kunotsvaka mabasa nechikafu chekuraramisa mhuri.

Nekuda kwekunetsa kwemvura, vanhu vakange vongochera mifuku munzizi vowana mvura yekumwa. **Chirwere** chekorera chakati tekeshe nyika yose. Vamwe vakatisiya nechirwere ichi, vamwe vakazonoponera kuzvipatara. Chidoko chapfuura chegore iri 2008.

Pindura mibvunzo iyi nezvirevo zvakazara.

1. Nzara iri mundima yakaitika mugore ripi?
2. Inzwi riri mundima rinoreva nhembe yeshure ndi_____.
3. Kufumobata jongwe muromo kudii?
4. Inzwi riri mundima rinoreva makwikkwi ndi _____.
5. Doma chekudya chaigadzirwa nehacha.
6. Vanhu vainotsvakei kune dzimwe nyika?
7. Ndechipi chirwere chakanetsa mugore iri?
8. Chii chaiitika kana makore akanyuka mudenga?
9. Zvinorevei kuti pfau pfau ndiye sarai?
10. Ndezvipi zvaunofunga kuti zvingaitwe nehurumende nevanhu kuti nzara ikauyazve isavaonese ndondo segore iri?

C

Pfupiso

Nyora pfupiso ine manzwi asingapfuuri makumi matatu uchitsanangura matambudziko akasanganikwa nowo mugore renzara. Yeuka manyorerwe epfupiso akanaka atakadzidza kumashure.

D

Kuzadzisa zvirevo nenyaudzosingwi

Nyaudzosingwi manzwi anotaridza maitikiro kana mataridzikiro echinhу sekuti;

Maitikiro echinhу

- (a) Akati pfacha kusvika.
- (b) Zuva rakati vhu-u kubuda.

Mataridzikiro echinhу

- (a) Mvura yakanga yakati ndo-o kusviba.
- (b) Dumbu rake rainge rakati tashu kuguta.

Sarudza nyanudzosingwi yakakodzera kuzadzisa zvirevo zvinotevera.

1. Shiri yakati _____ ichibva yatofa.
2. Akarohwa akati _____ kutarira pasi.
3. Mheni yakati _____.

4. Ramba wakati _____ nechuru chemutohwe.
5. Akatukwa akati _____ maziso.
6. Jokwe akati _____ kukwira mumuti.
7. Akanzwa bvudzi rake kuti _____ pavakapfuura napo.
8. Akatsenga nyama ndiye _____ kuimedza.
9. Onai akawanikwa akati _____ mumuti wainge azvisungirira.
10. Mvura yainge yava kuti _____ apo yaifashaira pamoto.

**fasha fasha
boi boi**

**vai vai
kata kata**

**tsiki tsiki
tangu tangu**

**kwati kwati
nyaу nyaу**

**vare vare
rezu rezu**

E

Nyakuita nanyakuitirwa

Nyakuita munhu, mhuka kana chinhu chinenge chaita chimwe chinhu. Nyakuitirwa anenge aitirwa zvimwe zvinhu somuenzaniso;

- (a) Mai varuka juzi.
 - (b) Mai ndivo nyakuita, juzi ndiro nyakuitirwa.
- Kana tichitanga chirevo ichi nanyakuitirwa tinoti;
- (c) Juzi rarukwa naamai.

Tanga zvirevo zvinotevera nanyakuitirwa.

1. Mai vatanha muchero.
2. Musikana achera mvura.
3. Chioneso azora mafuta.
4. Madhongi adya chakata.
5. Baba vaverenga bepanhau.
6. Muvhimi abata mhembwe.
7. Kumbirai adzima magetsi.
8. Vanhu vakwira dutavanhu.
9. Munashe agocha nyama.
10. Motokari yatsika mwana.

F

Rondedzero

Rondedzera gore rakwakapisa zvikuru mudunhu menu.

Rondedzero yako inofanira kuva nemanzwi asingapfuuri zana nemakumi maviri (manzwi 120). Shandisa pfungwa idzi ugowedzera dzako.

- Raive gore ripi?
- Mamirire ekunze ainge akaita sei?
- Zvii zvakaitika kuvanhu, mhuka neshiri?
- Zvii zvakaitika kumatsime, nzizi nemadhamu?
- Zvii zvakaitika kuzvirimwa?

- Vanhu vakararama sei?
- Rubatsiro rwakapiwa.
- Uipi hwenzara.

G

Kuzadzisa zvirevo nemazita ehama

Pachivanhu chedu vanhu vanoumba ukama. Ukama hunoumbwa nemitupo, kuroorerana kana chigarisano. Munhu wausina ukama naye anonzi mutorwa. Hama nehama hadzibvumirwi kuroorana. Ukama hunogona kutsanangurwa seizvi;

- (a) Mudzimai wababa vako unomuti mai.
- (b) Murume wamai vako unomuti baba.
- (c) Munin'ina wababa vako unomuti babamunini.

Zadzisa zvirevo izvi neinzwi rakakodzera.

1. Mukadzi wehanzvadzi yako unomuti _____.
2. Mukomana anoti _____ kune murume wehanzvadzi yake.
3. Mwana watete vako unomuti _____.
4. Mukoma wababa vako unomuti _____.
5. Mwana wehanzvadzi yemudzimai wako unomuti _____.
6. Mai vababa ndi _____.
7. Mukadzi anoti _____ kuna baba vemurume wake.
8. Vakomana vanoti _____ kune mukadzi wehanzvadzi dzemadzimai avo.
9. Murume wemwana wako unomuti _____.
10. Baba vamai vako ndi _____.

sekuru	muroora	mukuwasha	muzukuru	vatezvara
babamukuru	mbuya	muramu	ambuya	mukuwasha

H


Basa rekuita kumba

Tsanangura ukama uhwu sekuti;

- (a) Vatete – ihanzvadzi yababa vangu.
- (b) Ambuya – mai vamai vangu.
- (c) Sekuru – baba vamai vangu.

1. Muramu.
2. Vakadzinyina.
3. Ambuya.
4. Buda ndibudewo.
5. Sahwira.
6. Babamunini.
7. Maiguru.
8. Muzukuru.
9. Vamwene.
10. Vatezvara

Ndambakuudzwa akaonekwa nembonje pahuma



Verenga ndima iyi uchitevedza zvimiso, pane chimiso unomira pane chifema unombofema wozoenderera mberi pane kahadziko unokwidza inzwi rako.

Nhamo mwanakomana waVaChafa aigaroudzwa nababa vake VaChafa kuti asakwira **gomo** rionzi Gombe raive kumusha kwavo kuBuhera. Gomo iri raiera.

Nhamo akafunga kuti zvekuera kwemakomo zvainge zviri zvepasichigare. Akabva aisai zvitanda munzeve ndiye tande akananga kugomo reGombe **neshamwari** yake Tongai.

Vakomana ava vakati vaskika pagomo iri ndokutanga kuyengerana vachiti vaida kuona kuti kuera kwacho kudii. Vakabva vatarisana ndiye bvuu kuseka vachiti vakuru vainge vakaputirwa nechikare. Vanofunga kuti makomo achiri kuera mukore uno pasi pakarohwa nechimanje manje apo. Akaseka zvake Tongai.

Vaviri ava vakabva vati kata kata kukwira mugomo ndiye nyangara. Vakabva vagamuchirwa **nemunzvirumombe** wainge uzere nzviru kuti chakata. Vanakomana vakati dzawira mutswanda kunongera hadzichanetsi. Vakasvikotanha nzviru ndiye kandei **mumuromo**. Nhamo akafinyamisa kumeso ndokuti, "ptu, kushata!" Uyuwo Tongai akatevedzera Nhamo kuti nzviru idzi dzaishata.

Vaviri ava vakangoona **rima** kumeso kuti tsvete. Havana kuziva kuti vakaparadzana sei sezvo vainege vakaputirwa nerima. Nhamo paakazoti pembenu akaona ari pakati pegomo asi haana kuziva kuti ainge apasvika sei. Akati regai ndidzike mugomo iri. Paakati fambe fambe achiita seabva paakanga ari akakaruka adzokerazve pamusoro soro pegomo paakanga apembenukira.

Akaedza kusheedza shamwari yake Tongai asi hapana akamudavira kusiya kwemaungira egomo. Mwanakomana akabatwa nekutyka kukuru.

Shandisa nyaudzosingwi idzi muzvirevo sekuti;

(a) Nhamo akati **tande** nenzira akananga kuGombe.

(b) Tongai akati **nyangara** mugomo reGombe.

- | | |
|--------------|----------------|
| 1. pembenu | 6. tsvete |
| 2. bvu-u | 7. bherengende |
| 3. chakata | 8. bufu |
| 4. zvongonyo | 9. pfori |
| 5. rabada | 10. dhugu |

E

Zvakaitika, zviri kuitika nezvichaitika

Zvakaitika zvinoreva zviitiko zvave nenguva zvaitika kana zvakaitika kare sekuti;

(a) Gore rakapera ndakanayiwa nemvura.

(b) Nezuro ndakanhonga marara.

Kana tichiti zviri kuitika tinenge tichireva zviitiko zvenguva iyoyo sekuti;

(a) Mai vari kubika sadza.

(b) Izvozvi ndiri kunyora ChiShona.

Kana tichiti zvichaitika tinenge tichireva zviitiko zvenguva inotevera sekuti;

(a) Mangwana ndichafamba mudhorobha.

(b) Mwedzi unouya ndichaenda kuDubai.

Manzwi anofanira kutaridza zviitiko zvenguva dzakasiyana-siyana.

Sarudza inzwi rakakodzera kuzadzisa zvirevo izvi.

- | | | | |
|---|-------------|------------|-------------|
| 1. Nezuro _____ kudhorobha. | | | |
| ndinoenda | ndichaenda | ndakaenda | ndaenda |
| 2. Nhasi ----- mangwanani-ngwanani. | | | |
| ndakamuka | ndamuka | ndichamuka | ndinomuka |
| 3. Mangwana ----- mimhanzi. | | | |
| ndinoridza | ndicharidza | ndakaridza | ndaridza |
| 4. Gore rakapera ----- nenyoka. | | | |
| ndarumwa | ndinorumwa | ndakarumwa | ndicharumwa |
| 5. Mwedzi unouya ----- chivhitivhti. | | | |
| ndatenga | ndichatenga | ndakatenga | ndinotenga |
| 6. Nhasi mangwanani ----- mvura inotonhora. | | | |
| ndakageza | ndageza | ndichageza | ndinogeza |
| 7. Kuswera nezuro ----- mari nematsotsi. | | | |
| ndinobirwa | ndichabirwa | ndakabirwa | ndabirwa |
| 8. Vhiki inouya ----- bvunzo. | | | |
| ndakanyora | ndichanyora | ndanyora | ndinonyora |

9. Nhasi _____ maputi.
ndakakanga ndichakanga ndakanga ndinokanga
10. Izvozvi _____ nemoto.
ndakatsva ndatsva ndichatsva ndinotsva

F

Kunyora tsamba kuhama

Kana tichinyora tsamba kuhama tinonyora kero imwe chete. Mutsamba iyi munofanira kuva nemutauro wakasununguka. Unokwanisa kubvunza chero zvaunoda. Tsamba iyi inobvumira kubvunza mufaro. Mavambo etsamba chinangwa chawanyorera tsamba iyi. Mutumbi wetsamba une ndima dzinobuditsa pfungwa dziri mumubvunzo. Panoperera tsamba unonyora zita rako chete. Somuenzaniso:

Rusununguko School

Post Office Box 529

Chimanimani

12 Bandwe 2018

Wadiwa sekuru

Ndanyora tsamba iyi ndichida kukuudzai nezvemusi wandakarasika.

Wenyu muzukuru

Tinotenda

Zvino iwe chinyora tsamba kuhama yako uchiudza musi wawakarasika.

Mutumbi wetsamba unofanira kuva nemanzwi asingapfuri zana nemakumi maviri (manzwi 120). Shandisa pfungwa idzi uye wakasununguka kuwedzera pfungwa dzakowo.

- Waiva musi wechingani?
- Waiva kupi?
- Chii chakaitika?
- Wakarasika sei?
- Wakazoonekwa nani?
- Kubvunza mufaro.

G

Zvieraera

Zvieraera zvaivako kubva pasichigare. Zvaiita kuti vana vasatyora mitemo uye vakure vakangwarira upenyu kuti varegere kupinda mumatambudziko. Zvaiita kuti vana vakure vasina uchapa, vagone kuzvidzivirira kunjodzi uye vagone kuremekedza vakuru vavo sekuti;

Chikamu

21

DUTUMUPENGO

A

Hurukuro

Dutumupengo zvinoreva mvura zhinji nedutu remhepo. Imvura inenge ichinaya zvine simba iine mhepo. Mvura iyi inoparadza vanhu, mhuka, zvivakwa pamwe nekuuraya vanhu nemhuka.

Tauriranai kuti:

- Ndeapi mamirire ekunze anenge aripo kana kwaita dutumupengo?
- Ndeapi matambudziko anosanganikwa nawo nevanhu padutumupengo?
- Matambudziko aya angagadziriswa sei?

Manzwi ari mundima

Manzwi anogona kureva zvakafanana sekuti;

zvakakona – zvakaramba

mizhinji – yakawanda

ura – matumbu

Ipa inzwi rinoreva zvakafanana neiri.

- (a) wakasimba
- (b) vazhinji
- (c) fodya
- (d) manyemwe
- (e) kushambira
- (f) dombo
- (g) matsimba
- (h) ndondo

- (a) Kufarisa – kutamba nemuswe wasekuru / kupinda nemwenje mudziva / kuridza ngoma nedemo.
- (b) Kugarika – kupura nyemba nemusana / kutandavara serunyemba.
- (c) Kuvengana – kurimirana kumuganhu.

Ipa dimikira rine dudziro iyi;

1. Kuzvipinza mumatambudziko –
2. Kugarira pasina –
3. Kutambura zvikuru –
4. Kusiya panzvimbo uchiri kupada –
5. Kunakirwa –
6. Kufambira pasina –
7. Kuwirirana zvikuru –
8. Kuva munhu wechidiki –
9. Kuita zvinhu nemazvo –
10. Kushingirira –

Kubaya dede nemumukanwa.

Kuruma chirebvu.

Kugarira guyo sembwa.

Kurumwa nechokuchera.

Kuva mukombe nechirongo.

Kutemwa dzinobuda ropa.

Kunhonga svosve nemuromo.

Kusiya ngoma ichirira.

Kunzwa parere mwoyo.

Kufambira dhongi rakaora.

E

Kuisa manzwi muuwandu


Kuisa manzwi muuwandu zvinoreva kuisa manzwi kuzvihinji semuenzaniso;

- (a) munzwa – minzwa
- (b) duri – maturi
- (c) dova – dova

Isa inzwi rakatarwa muuwandu.

1. Itai akaona howa muchuru.
2. Ini ndinofarira kudya fushe.
3. Sekuru vafamba rwendo.
4. Inzwa kurira kuri kuita dafi.
5. Sesedzai abva zino ava nevende.
6. Vese vainge vakasuwa pachiso.
7. Chemhere kakakura kachinzwa tsitsi kari kakomana.

Girafu rinatevera rinetaridza mari yakaunganidzwa nevana vepachikoro cheNtabazinduna kuBulawayo vachibatsira vana vanotambura. Rugwaro rwega rwega rwakaunganidza mari.



Pindura mibvunzo inotevera nezvirevo zvakazara uye neChiShona chakanaka.

1. Vana verugwaro rwekutanga vakaunganidza mari?
2. Ndevapi vana vakaunganidza mari yakawanda kupfuura vese?
3. Ndevapi vana vakaunganidza mari shoma pane vose?
4. Vana verugwaro rwechina vakaunganidza mari?
5. Vana verugwaro rwechitanhatu vakaunganidza mari?
6. Ndeapi magwaro maviri akaunganidza mari yakafanana?
7. Vana verugwaro rwipi vakaunganidza madhora gumi nemashanu?
8. Vana verugwaro rwechitanhatu nerwechinomwe vakaunganidza mari yose yabatanidzwa?
9. Tipe musiyano uripo pamari yakaunganidzwa nevana verugwaro rwechinomwe neverugwaro rwechipiri.
10. Mari yese yakaunganidzwa nevana vepaNdabazinduna imari?

Chenjedzo

Kana wabatwa nechirwere ichi chimbidza kuenda kuchipatara unorapwa. Ukanonoka chirwere ichi chinopinda muurozvi. Kana chirwere ichi chapinda muurozvi munhu anogona kurwara njere ozopedzisira atorwa nedenga. Ngatizvichenjerei pachirwere chemarariya. Akuruma nzeve ndewako!

Sarudza mhinduro yakakodzera pamibvunzo iyi.

C

Pfupiso

Nyora pfupiso ine manzwi asingapfuuri makumi matatu uchitsanangura chirwere chemarariya.

D

Manzwi anoreva zvakasiyana-siyana

Manzwi anogona kufanana manyorerwe kana chiperengo asi iwo achireva zvakasiyana semuenzaniso;

- (a) Amai **vadura** kuti vanoroya.
 - (b) Taisa nzunzu **mudura**.

(c) Mwana uyu ane chipo chekuimba.

(d) Ndakamuona achivaka imba.

Ipa zvirevo zvinotaridza kuti manzwi aya anoreva zvakasiyana.

- | | |
|-----------|-----------|
| 1. Doro | 6. Mugomo |
| 2. Guru | 7. Kamba |
| 3. Chema | 8. Nzara |
| 4. Makore | 9. Rinda |
| 5. Gura | 10. Kura |

E

Zambiringa munyemba

Zambiringa munyemba zvinoreva inzwi rinenge risina ukama nemamwe manzwi akapiwa sekuti;

(a) Dutavanhu motokari chikepe bhasikoro

Chikepe ndicho zambiringa munyemba nekuti zvimwe zvese zvifambiso zvemumugwagwa icho chifambiso chemumvura.

(b) Harahwa sekuru ambuya baba

Ambuya ndivo zambiringa munyemba nekuti ndivo vega mukadzi pakati pevarume.

Doma zambiringa munyemba pamanzwi akapiwa. Ipa chikonzero.

- | | | | |
|--------------|------------|------------|-------------|
| 1. Makumbo | maziso | nzeve | duri |
| 2. Tsono | chigero | gumbo | jekeiseni |
| 3. Chipunu | forogo | tswanda | banga |
| 4. Bhuku | hwamanda | bepanhau | nganonyorwa |
| 5. Mbavha | mukoti | mabharani | mutyairi |
| 6. Sekuru | babamukuru | mainini | vatezvara |
| 7. Mabhanana | mengo | maranjisi | tsubvu |
| 8. Shangu | nguwani | mapatapata | manyatera |
| 9. Chibage | nyimo | mapuno | nzungu |
| 10. Matapura | mabura | hanyanisi | chibage |

F

Kunyora rondonedzero yehurukuro

Kana tichinyora hurukuro tinotanga nemavambo anoburitsa pavanenge vari vanokurukurirana kana kuti mamire ekunze. Vanhu vaviri vanotaurirana ava chero vakambokakavadzana vanofanira kusvika pakuzotenderana chinhu chimwe. Hurukuro haifaniri kusiya makakatanwa. Inofanira kusiya zvinhu zvagadzikana matambudziko agadziriswa.

Nyora hurukuro pakati pemukoti nemunhu anorwara.

Zadzisa zvirevo izvi neinzwi rakakodzera.

1. Bhazi rakati hutu _____.
2. Akati petu petu _____.
3. Nhengeni dzainge dzakati piriviri _____.
4. Ainge akati rukutu _____.
5. Baba vakati dhu-u _____ nhamo dzainge dzavawira.
6. Usamboti bufu _____ nyaya iyi.
7. Akati kata kata _____ mumuti.
8. Nyama yaiti kutu _____.
9. Nyuchi dzakati ndure _____ Taonga.
10. Zuva rakati vhu-u _____.

kubuda	kuenda	kudzoka	kutsvuka	kuneta
kufunga	kutura	kukwira	kunhuwa	kuruma

E

Zvaitika, zviri kuitika nezvichaitika

Zvakaitika zvinoreva zviitiko zvekare zvakapfuura. Zviri kuitika zviitiko zvenguva iyoyo kana cuti zviri kuitika panguva idzodzo. Zvichaitika zvinoreva zviitiko zvenguva ichauya semuenzaniso;

- (a) Zvakaitika – Munashe akarasa bhuku.
- (b) Zviri kuitika – Mainini vari kuona chivhitivhiti.
- (c) Zvichaitika – mwedzi unouya ndichanoona makwikwi enhabvu yevakomana.

Zadzisa zvirevo izvi neinzwi rakakodzera.

1. Garikai _____ achiba nezuro.

abatwa	achabatwa	akabatwa	ari kubatwa
--------	-----------	----------	-------------
2. Mai Muchineripi _____ ruregerero mangwana.

vakareva	vari kureva	vachareva	vareva
----------	-------------	-----------	--------
3. VaDzasukwa _____ izvozvi.

vatukwa	vari kutukwa	vanotukwa	vakatukwa
---------	--------------	-----------	-----------
4. Gore rinouya _____ kuZambia

ndaenda	ndinoenda	ndichaenda	ndiri kuenda
---------	-----------	------------	--------------
5. Mwedzi wakaperu _____ vanhu vese muchikoro.

ndakunda	ndichakunda	ndakakunda	ndiri kukunda
----------	-------------	------------	---------------
6. Izvozvi Tungamira _____ bhasikoro.

achovha	ari kuchovha	achachovha	akachovha
---------	--------------	------------	-----------
7. Mwaka unouya _____.

ndarima	ndinorima	ndakarima	ndicharima
---------	-----------	-----------	------------
8. Nhasi hanzvadzi yangu _____.

icharoorwa	iri kuroorwa	yakaroorwa	yazoroorwa
------------	--------------	------------	------------
9. Izvozvi mai _____ mupunga.

vakabika	vachabika	vari kubika	vabika
----------	-----------	-------------	--------

Muchato waMunaro naMuchaneta



Verenga ndima iyi uchidana manzwi zvakanaka.

Muroora tauya naye,
Muroora tauya naye,
Muroora tauya naye nemagumbeze.

Urwu rwiyo rwakange rwuchiimbwa naanavatete vachitambira muroora wavo Muchaneta. Iye Muchaneta akanga ari mudenga rechinomwe. Aifamba zvishoma zvishoma sekamba. Madzitete aya aikusha mupunga nezvihwitsi.

Muchaneta ainge ari ngirozi chaiyo parunako. Ainge akapfeka gauni jena akafuka musoro wake. Madhikanzi nemhete zvaipenyapenya pangirozi Muchaneta.

Madzitete aMuchaneta akatangawo kuimbira Munaro vachiti, "Munaro kunaka wakanaka asi gudo riri nane." Munaro ainge akapfeka sutu nhema neshangu nhema. Musi uyu aive hamburamakaka yerume chaiyo.

Wainge uri musi wa12 Nyamavhuvhu 2010 kuHarare Gardens apo Munaro naMuchaneta vakange vachichata. Mimhanzi yaanajah Prayzah, Winky D naMacheso yaidandaura zuva iri.

Mufundisi Gonese vakaparidzira vaviri ava kuti vaizogara sei semurume nemukadzi. Vaviri ava vakazopanana **mhiko** dzavo. Vakapiwa mukana wekuratidzana rudo vachitsvodana.

Vabatidzi vakapiwa mukana wekumveesana. Vaiti vakaenda kumberi, voenda kumasure. Vakaenda kurudyi, voenda kuruboshwe. Izvi zvaida kuzvionera pamhino sefodya kwete kutaurirwa sembare dzekumusana. Vana vevanhu vaiita kutsvikidza zviuno semukonimukoni.

Keke rakachekwa nevachati rikapiwa vanhu. Vanhu vese vaivepo vakapiwa chidimbu chekeke.

Vanhu vakaudzwa nemushamarari kuti vaende kunodya. Chikafu chaise mavhu nemarara. Zvaiti sadza jena, sadza rezviyo, mupunga une dovi neusina, nyama yehuku, yembudzi, yemombe neyenguruve. Paive nematapura, bhinzi nemasoseji. Zvinwiwa zvinotonhorera nezvinodhaka zvaive sharaude. Vaive nenhomba yenyama musi uyu yakapera. Vaive nemashavi edoro vakamapira zuva iri.

Nguva yezvipo yakati yasvika vanhu vakabisa zvipo vachitukirira nekuraira vachati. Vamwewo ndivo vaiyemura vachati. Zvipo zvaiti zvipfuwo, midziyo yemumba, zvipfeko nemari. Vachati ava vakawana zvipo zvakawanda.

Chisingaperi chinoshura. Zuva rakazogara miti. Mutambo ndiyе tande kwatinoziva tose kwamvurayachebakumbo. Iri izuva risingakanganwikwi muupenyu. Munaro naMuchaneta vava baba namai.

Pindura mibvunzo inotevera.

1. Ndivanaani vaichata?
2. Vachati ava vakachata rini?
3. Ndiani aiimbira muroora?
4. Munaro aive akapfekei?
5. Ndiani akapa vaviri ava mhiko dzemuchato?
6. Inzwi riri mundima rimoreva havi yenyama ndi_____.
7. Ndivanaani vaimveesana?
8. Zvinorevei kuti kuva mudenga rechinomwe?
9. Chikafu chaise mavhu nemarara zvinoreva kuti _____.
10. Kuti zuva rogara miti zvinoreva kuti _____.

C

Pfupiso

Nyora pfupiso ine manzwi makumi matatu uchitsanangura zvakaitika pamuchato waMunaro naMuchaneta.

D

Kuzadzisa tsumo

Tsumo mutauro waiveko kubva pasichigare. Dzinodzidzisa, dzinoraira, dzinotsiura nekutonga mhosva. Kune tsumo dzinenge dzine mhuka sekuti;

- (a) Chidamwoyo hamba yakada makwati.
- (b) Kure kwegava ndiko kusina mutsubvu.

Zadzisa tsumo dzemhuka dzinotevera.

1. Chinono chine ingwe _____.
2. Gudo kuipa kuipa zvaro _____.
3. _____ musi wenjodzi anorwirana.
4. Ngwena haidyi chebamba _____.
5. Dindingwe rilonaka richakweva rimwe _____.

6. _____ chemudzimu chikuwaniremo.
7. Katiyo kupinda muzai _____.
8. _____ zuva kuona mwena.
9. Mbudzi kuzvarira pavanhu.
10. Zvina manenji _____.

E

Zvipauro

Zvipauro manzwi anotsanangura zita. Zvinogona kureva uwandu kana chimiro chezita sezvamuchaona pamienzaniso miviri inotevera;

- (a) Ane mombe **nhatu**.
- (b) Rudo musikana **mupfupi**.

Sarudza chipauro chakakodzera kuzadzisa zvirevo izvi.

- | | | | | |
|-------------------------|-----------------|-----------------|-----------------|----------------|
| 1. Ipwa iyi _____. | irefu | murefu | chirefu | karefu. |
| 2. Tsuro iyi _____. | rakangwara | chakangwara | yakangwara | hwakangwara |
| 3. Muchaneta _____. | katsvarakadenga | mutsvarakadenga | zitsvarakadenga | itsvarakadenga |
| 4. Tsime iri _____. | yakadzika | chakadzika | rakadzika | hwakadzika |
| 5. Hohwa uhwu _____. | ishanu | rushanu | hushanu | chishanu |
| 6. Bhuku iri _____. | kanonakidza | chinonakidza | rinonakidza | runonakidza |
| 7. Keke iri _____. | rinonaka | hunonaka | kanonaka | chinonaka |
| 8. Vabatidzi ava _____. | vanotamba | kanotamba | zvinotamba | rinotamba |
| 9. Mudziyo uyu _____. | kukuru | chikuru | ihuru | mukuru |
| 10. Nzungu idzi _____. | kanoputika | rinoputika | chinoputika | dzinoputika |

F

Rondedzero

Rondedzera muchato wawakaona.

Rondedzero yako inofanira kuva nemanzwi anoita zana kusvika zana nemakumi maviri. Nyora pfungwa idzi wowedzerawo dzako.

- Waive musi wechingani?

BVUNZO YECHITATU

BEPA REKUTANGA

Verenga ndima iyi ugopindura mibvunzo inotevera.

Semunhu ainge asati ambosvika mudhorobha, Wadzanai akati vhu-u pamusika weMbare nedutavanhu rekwaMukumba. Wadzanai akati rita rita oshaya kuti onanga kipi. Akabva aona chimwe chikomana chainge chakamonwa bvudzi mumusoro ndokuchibvunza achiti, “Unoziva panogara sekuru vangu VaTigere here?”

Chiya chikomana chakati dzawira mutswanda kunongera hadzichanetsi. Chakati kuna Wadzanai, “E-e ndinovaziva. Nditevere ndinokutaridza kwavanogara.” Chikomana ichi, Fatso chakaona zvacho kuti Wadzanai ainge akaputirwa neruzevha. Chakati nechemumwoyo “Chawawana batisisa mudzimu haipi kaviri.”

Chakasvika naWadzanai pane mumwe mukoto ndokuudza Wadzanai kuti aburitse zvese zvaave nazvo muhomwe chero dzakavanda nekuti kwavaaienda kwainge kusingatenderwi zvinhu muhomwe. Wadzanai akabudisa mari yese oipa kuna Fatso. Fatso akaudza Wadzanai kuti amupe bheke anosanopa sekuru nekuvazivisa kuti vaita muenzi. Negope, Wadzanai akapa Fatso bheke renhumbi ndokusara angova munhu zvake.

Pindura mibvunzo iyi.

1. Wadzanai akasvika kipi?
A. KuKwekwe B. KuMbare C. KuGweru D. KuGokwe
2. Sekuru vaWadzanai vainzi ani?
A. VaMukimba B. VaMbare C. VaTigere D. VaFatso
3. Wadzanai akanga achionekwa kuti ainge abva _____.
A. kudhorobha B. kuruzevha C. kupurazi D. kutaundishipi
4. Chikomana chakagashira Wadzanai chainzi ani?
A. Tigere B. Mukumba C. Fatso D. Mbare
5. Inzwi riri mundima rimoreva mbudu ndi _____.
A. tswanda B. muenzi C. bheke D. homwe
6. Inzwi riri mundima rimoreva kuti kusingabvumirwe ndi _____.
A. kutaridza B. kusingatenderwi C. kuvalivisa D. kunongera

Pindura mibvunzo iyi.

15. Ndiani akanyora tsamba iyi?
A. Ndibaba B. NdiKudzai C. NdiKariba D. NdiDhamu
16. Kudzai aidzidza kipi?
A. KuGweru B. KuKariba C. KuChikepe D. KwaChihambakwe
17. Vaizoenda kunzvimbo inoyevedza inonzi?
A. Chihambakwe B. Kariba C. Gweru D. Chikepe
18. Magetsi anogadzirwa nei?
A. Nemoto B. Nehove C. Nemvura D. Nedhamu
19. Rwendo urwu runoda marii?
A. Madhora gumi B. Madhora mapfumbamwe
C. Madhora makumi mapfumbamwe D. Madhora gumi nemapfumbamwe
20. Mari iyi inodiwa rini?
A. Nhasi B. Kupera kwевhiki C. Vhiki inouya D. Kupera kwemwedzi
21. Baba vaKudzai vaigara kipi?
A. KuKariba B. KuGweru C. Kumusha D. KwaChihambakwe

Zvinorevei kuti;

22. Kuva zuru rakapinda nyoka.
A. chinhu chitsva B. chinhu chasakara
C. chinhu chinoyevedza D. chinhu chinotyisa
23. Kutsika madziro.
A. kubvuma B. kuramba C. kugamuchira D. kunetseka
24. Kuzvidya mwoyo.
A. kufungisia B. kushaya hanya C. kunakirwa D. kufarisa

Ipa inzwi rinoreva zvakafanana nerakatarwa.

25. Akange achigunun'una zvainge aitirwa.
A. achifarira B. achinetseka C. achitukirwa D. achionererwa
26. Kurumidza kuuya neupfu.
A. kasika B. nonoka C. nyozera D. kambaira
27. Akabaiwa nefeso.
A. munzwa B. soso C. waya D. jekiseni

Verenga ndima iyi ugopindura mibvunzo inotevera.

Dhliwayo Beta,
Wabata Dhliwayo,
Mamberere mauruka,
Mutiwakapa manjeketere,
Majuru mazivanguva,
Diutiu rangu iri,

Matukutu wedanda,
Madzivire chikukwa,
Chinovava

Sarudza chirevo chakanyorwa zvakanaka.

40. A. Maita Dhliwayo Beta. Vakadaro amai.
- B. "Maita Dhliwayo Beta." Vakadaro amai.
- C. "Maita Dhliwayo Beta. Vakadaro amai."
- D. "Maita Dhliwayo Beta. Vakadaro" amai.

BEPA RECHIPIRI

Chikamu chekutanga: Rondedzero (mamakisi 20)

Sarudza musoro mumwe chete ugonyora rondedzero, mhan'aro, hurukuro kana tsamba ine manzwi asingapfuure zana nemakumi maviri (manzwi 120).

1. Tsanangura zvinoitika mugore renzara.
2. Nyora hurukuro pakati pemudzidzisi nemwana anotiza chikoro.
3. Nyora mhan'aro kumukuru wechikoro chenyu uchimutsanangurira mafambiro amakaita muchienda kumutambo wenchabvu nevamwe vana vepachikoro penyu.
4. Nyora tsamba kushamwari yako uchiudza musi wawakabata mbavha.
5. Rondedzera mhosva yawakapara.

Chikamu chechipiri: Nzwisiso (mamakisi 5)

Verenga ndima iyi ugopindura mibvunzo inotevera.

Mumwaka wezhizha nguva zhinji denga rinenge rakati dhuma nemakore. Vanhu vanenge vari shina shina kusakura muminda. Rega uone zvinoita mupande nemheni, ungati magetsi aputika. Iyi nguva zvekudya zvinenge zvakati chakata.

Ipwa, mavisi, manhangwa nemapudzi inenge iri sharaude. Kana riri gore remaguta vanhu vanoita sevachatsemuka matumbu nekugutisa. Zvisikwa zvese zvinenge zvichifara. Makurwe anenge achiridza mhururu muminda. Matatyा anenge achidzvova ari mumvura achifarira mvura itsva inobva kuna Musikavanhu. Shiri dzinenge dzichiimba nziyo dzakasiyana-siyana.

Mumasango howa hunenge hwakati chakata. Shwarara dzinoti farara dzichichata munguva iyi. Chisikwa chese chinofema chinenge chichifarira nguva yezhizha. Mombe, mbudzi, makwai nembongoro zvinenge zvichifura sora rakati zvi-i kusvibira. Zvipfuwo nemhuka dzesango zvinenge zvichiita bira zvichinakirwa nekudya kunotapira.

Pindura mibvunzo iyi.

1. Vanhu vanenge vachiita basa rei mumwaka wezhizha? [1]
2. Ndechipi chipuka chanzi chinenge chichiridza mhururu muminda? [1]
3. Inzwi riri mundima rimoreva Mwari ndi _____. [1]
4. Zvinorevei kuti zvekudya zvinenge zvakati chakata? [1]
5. Chii chinokonzerwa kuti vanhu vajite sevachatsemuka matumbu muzhizha? [1]

Pfupiso (mamakisi 5)

Nyora pfupiso ine manzwi asingapfuuri makumi matatu uchitsanangura kunaka kwenguva yezhizha.